



Le Percha va in vantaje, mo la gran reaziun di ladins fej ciamó avalié le resultat püch dan le pröm tēmp. L'autogol dl Perca é spo dezisif por le resultat final.

L'ultima sabeda s'á la squadra da La Val metü sön trü por jí a soghé a Percha y é stada buna cun carater de condüj a ciasa na devēnta miritada. La formaziun ladina é stada la miú squadra te ciamp, cun le palê che n'à indî nia urü jí te rēi.

La partida mēt man cun La Val al'atach, i sogadus é plö reatifs co i avversars y devēnta prigorusc sön les perts. Bele ti pröms menüc röia Christian y Alex a alzé le palê amez por i cumpagns, che ne rüva indere nia a contlujun. Tosc pon udēi la pröma ocasiun de Alexander che se porta da na pert jö y pro na trata alta che sfiorēia la stangia de porta. Pro le Perca é le sterch sogadú amez che fej jüch y procurēia ince val puniziun al limit. Al 25[^] é le jonn Christian Dapoz che fej pié ia na bela combinaziun cun Marco S. al limit y prô la trata sēcia, le verdaporta mēss se destrá por devié te ciantun. Al somēia le dērt momēnt por jí in vantaje, le druch ladin fej aretré i avversars che mēss scialdi sciuré dant le palê. La duscia frēida vëgn spo al 40[^], sön na trata dal ciantun é le atacant Peintner dl Percha che abina le curan cun n bel stach de ce y le fej rové te rēi por le 1 a 0. La reaziun dla formaziun ladina al vantaje avversar é ejemplara, püch dô le gol vëgn Christian sorví dal mezciamp y da inant le palê a Franz che ne sighita nia y vega

la trata a bót sigü sot la stangia de porta ite. N gran gol por Franz che a valiëia le resultat a püc secunc dan la fin dl pröm tēmp.

Le pröm temp se stlüt jö sön le resultat de 1 a 1

Ti pröms 20 menüc dl secundo tēmp se stēnta i sogadus da La Val a imposté le jüch y a tigní la posiziun. Gonot ne vëgn i atacanc dales perts nia marcá y pó ruvé saurí pormez al'area ladina a trá. La concentrasiun dl'portier Sepl ne fej passé degügn pai y le medemo fej alzé la squadra cun trates lunges por i atacanc. Tosc é indo le bel jüch dl pröm tēmp da udëi, i sogadus a mezciamp fej rové i cumpagns dan porta mo le gol dl vantaje cina le 70^a ne gareta nia. Avisate chēsc momēnt é na crossada ladina da na pert che porta fortüna, le defensur dl Percha prô l'antizip de ce sön Adrian y apogëia le curan zeruch al portier, i dui ne se capësc nia y le palê rôia te rêi impede tles mans dl un Harrasser. La fortüna chirida porta La Val in vantaje.

Floriani mēt te ciamp sogadus frësc por tigní le vantaje, un de chisc é ince Luca P., le pröm palê sön le pé é bel na ocajiun da gol d'or. Alex se fe lerch sön la fascia y mēt n bel preparatif amez por Luca che mëss aretré por controlé le pale y tra te porta. La trata é indere debla y rôia dlungia porta ia.

Ti ultims diesc menüc é ciamó le Percha che va al'atach, la defenjiun respogn cun determinasiun y evitëia insciö le peso. Le mandl fosch fej tosc ruvé la partida, la bela prestaziun di ladins vëgn premiada cun la devēnta y i trëi punc te sach.

Percha – La Val : 1 - 2

Formaziun La Val: 1. Sepl Kantioler, 2. Werner Sottara, 3. Marco Castlunger, 4. Paolo Vallazza, 5. David Moling, 6. Franz Tolpeit, 7. Christian Dapoz (dal 75^a Luca Pescollderung), 8. Stefan Sottara - capitan, 9. Marco Sottara (dal 60^a Felix Nagler), 10. Alex Elzenbaumer, 11. Alexander Miribung (dal 45^a Adrian Miribung)

Proscima partida: en domënia ai 27 de setëmbër dales 15:30 te ciasa cuntra le Sest

Insëra, mercuri ai 23 de aurì él gnü sughé l'andata dla semifinala de Copa Provincia cuntra la squadra da Ritten, che süga le campionat trê te 3 categoria mo te n ater girone. La squadra da La Val à incuntè na squadra sterscia, che à lascè udëi sües cualitês portan a ciasa la devënta por 2 a 0. Ai 7 de mà gnaral sughé le ritorno sön le ciamp dl Ritten.